

四庫全書

史部

欽定四庫全書

平定三逆方畧卷五

康熙十三年四月丙申

諭諸將帥防禦機宜

時奉使雲南侍郎哲勒肯等還至武昌携有吳
三桂奏章將軍尼雅翰疏

聞

上諭大將軍順承郡王勒爾錦將軍尼雅翰瓦爾喀赫

業副都統根特巴圖魯席布及平南王尚可喜總督
金光祖曰將軍尼雅翰奏言奉使雲南大臣已至武
昌有吳三桂奏本朕思吳三桂素多狡詐此中疑有
詭計如吳三桂服罪請降王及將軍等仍議招致之
益加警備毋墮奸謀即三桂束身歸命王等但以禮
受降其官屬當益加嚴防不可分散兵力急於前進
務相機以行

丁酉總督蔡毓榮奏洪福叛於鄖陽提督佟國瑤

等率兵擊敗之

鄖陽副將洪福素與楊來嘉合謀於三月十九日以前所部兵叛圍攻提督佟國瑤署國瑤同遊擊杜英率兵奮擊敗之福引兵宵遁

己亥革總督蔡毓榮職降鄂善五級俱留任戴罪圖功

吏兵二部奏蔡毓榮總督川湖聞吳三桂反叛不能安民心固疆圉不令提督桑額往守常德

致常澧長岳相繼陷賊應革職雲南總督鄂善
既奉

旨與蔡毓榮公議軍機事務地方失守罪亦難逭應降
五級調用

上命蔡毓榮革職鄂善降五級各留任戴罪圖功
命內大臣阿密達領兵赴懷慶

上諭議政王等頃安塘筆帖式向侍衛關保言河北總
兵蔡祿潛通叛鎮楊來嘉令兵丁借稱捕魚披甲行

走有叛狀民心驚疑著內大臣阿密達帶每佐領護軍一人每旗護軍叅領一員速赴懷慶詳問蔡祿捕魚之由此行官兵該部量給馬匹翼日阿密達即率

兵起行

癸卯調副都統德業立協守襄陽

上命經畧莫洛將軍席卜臣總督哈占於西安閒丁內選數百人令其披甲給以馬匹器械并席卜臣等所領兵內每佐領出驍騎一人令副都統德業立領赴

襄陽同都統范達禮鎮守內大臣阿密達事竣所領
護軍亦令德業立率往以資守禦其襄陽副都統託
代於德業立至時即領其所部官兵赴順承郡王軍
前

甲辰

命平南王尚可喜總督金光祖叅酌軍務機宜

先是可喜奏言孫延齡偽檄有三藩之語閩省
又倏告變臣與耿精忠本係姻婭不能不踴躍

於中竊臣叨王位年已七十有餘雖至愚至陋
豈肯向逆賊再求功名富貴乎惟知捐軀矢志
極力撐持保固嶺南一塊土以表臣始終之誠
奏上得

旨王累朝勲舊性篤忠貞朕心久已洞悉近復屢據猷
畧保固巖疆厥功甚茂攬奏披瀝悃忱深為可嘉著
益殫心料理相機勦禦以副朕倚任之意至是

上復諭兵部平南王尚可喜所奏調遣官兵保固疆圉

忠誠顯著深為可嘉兩廣一應軍機調遣及固守地方事宜著可喜與總督金光祖同心合力務酌萬全

下巡撫盧震獄

先因偏沅巡撫盧震棄長沙奔回

上遣部員往逮之至是至京法司讞奏震為封疆大臣乃於長沙未變之先委地潛逃罪應死

上命下震獄

命都統拉哈達為鎮東將軍帥師駐克州

先是遣理藩院郎中馬喇等調發喀喇沁土默特部落兵至是

上諭議政王等克州駐防官兵既調江西今授都統拉哈達為鎮東將軍同副都統伯穆赫林幹都海率滿洲蒙古每佐領驍騎一人及所調喀喇沁土默特兵二千人往駐克州穆赫林幹都海叅贊軍務尋拉哈達起行

上面諭之曰爾等毋得犯民間秋毫無犯嚴禁兵丁勿行

擾害其副都統穆赫林俟蒙古兵到時隨後遣發

乙巳以平南王尚可喜子之孝襲王爵

可喜奏稱

太宗皇帝時襲職之子不論年長必選才能今臣年逾七

十若不早決於生前竊恐債轅于異日臣察衆

子中惟次子都統尚之孝律已端慎馭下寬厚

可繼臣職至於軍機戰守緩急事宜臣雖衰老

不能馳驅然一日尚存當盡一日之心指揮調

度斷不至有悞封疆也疏入

上允之

丁未

詔削奪孫延齡官爵宣諭廣西軍民

上諭兵部逆賊孫延齡原係定南王下末弁之子本無才能功績祇緣定南王孔有德航海歸誠出師盡節世祖章皇帝憫其忠勲茂著官兵人等不忍分離收合散亡俾為一旅仍以所屬官員統之養贍加恩概從優

厚追朕御極念延齡既配王女理應量加寵榮故授
為將軍使之管理定南王所遺官兵鎮守粵西在延
齡叨冒榮階自應恪恭職掌殫忠報効乃蒞任以來
屢有過犯及累經王永年等訐奏賊罪部議從重處
分朕猶以定南王之功曲加貸宥仍令管兵如故近
復賜以撫蠻將軍之印委任有加恩寵罔替不意延
齡包藏禍心背恩忘義結連逆賊吳三桂輒行反叛
煽亂地方國法難容宜加顯戮令削其將軍職銜大

兵指日進勦立正典刑但念其所管官兵係定南王
所屬受恩累朝忠義素著必不甘心從逆隳棄前勲
其所管人員及地方官兵有能擒斬延齡投獻軍前
者優加爵賞或以兵馬城池納款者論功叙錄或力
有不逮能自拔來歸者亦免罪收用至于伊等父兄
子弟見在京城直隸各省者概不株連毋得心懷疑
畏自罹法網負朕好生之意爾部即速行遍諭

調江寧諸處兵援浙江

先是

上諭江寧將軍額楚總督阿席熙曰閩中告變兩浙需兵杭州將軍圖喇等如調爾滿兵時令副都統一員馬兵千名水陸往援爾等當預備以俟爾兵若行可調安慶察哈爾兵至江寧鎮守并

諭杭州將軍圖喇總督李之芳提督塞伯理等曰耿精忠反叛爾等率領滿漢官兵應作何防禦固守相機而行朕已勅駐防江寧滿兵預備若有需用滿兵之

時向江寧調取至是福建事急

上復命江寧預脩之兵不必俟調副都統瑚圖即統率
從水陸速赴杭州駐劄安慶副都統瑪哈達親率所
部官兵及江寧左翼察哈爾官兵并速赴杭州同將
軍圖喇等酌行將軍華善于所部漢軍內擇馬肥者
五百人令夸蘭大二員領之亦即赴杭州聽圖喇等
調遣其安慶右翼察哈爾官兵移守江寧華善仍令
送赴京口

臣謹按耿逆倡亂閩中兩浙密邇賊巢所關

綦重兩浙固則江南財賦之地安堵無虞

皇上燭知形勢要害故

勅守土之臣盡力固圉呼吸之間援兵四集賊進無所據師老而潰仙霞不守蓋扼要爭先之效也

吳應熊等伏誅

吳三桂初反時執其子應熊孫世霖等拘之三

月兵部尚書王熙及戶科給事中顧圖奏請將

應熊等速正典刑疏入下議政王貝勒大臣集
議既王等議覆於是

命將應熊世霖處絞其餘人犯分別正法復

諭兵刑二部逆賊吳三桂值明季閭賊之變委身從賊
尋窮竄來歸

世祖章皇帝念其投誠優封王爵授之軍旅委以事權異
數殊恩振古未有爰及朕躬特進親王倚任等于腹
心恩禮加于勲舊方期感恩圖報殫極忠忱詎意三

桂以梟獍之資懷徂詐之計陰圖不軌自起釁端藉請搬移輒行叛逆煽惑奸宄荼毒生靈極惡窮兇神人共憤已經遣發大兵進剿刻期蕩平諸王大臣會議反逆子孫理應誅戮以彰國法再三奏請朕尚冀其悔禍自新束身待罪未忍加誅近覽三桂奏章詞語乖戾妄行乞請諸王大臣咸以三桂怙惡不悛其子孫即宜棄市義難寬緩朕思亂臣賊子孽由自作刑章具在衆論僉同朕亦不得而曲貸之也法應如

廷議將吳應熊吳世霖并其餘子俱凌遲處死但以
應熊久在近侍朕心不忍故將應熊及其子世霖處
絞其餘應坐人犯分別正法所有干連人等情罪稍
可矜原者勅所司概行省釋以昭法外之仁爾二部
即通行曉諭內外軍民人等俾咸悉朕意

戊申

命給甘肅提督張勇世職

時勇舉首偽書并執逆使

上嘉其忠因給一等阿達哈哈番

己酉增遣滿兵守江寧

上諭議政王等江寧滿兵既分千人援浙恐江寧兵單
可出包衣佐領兵千人八旗每佐領驍騎二人往守
江寧以駐懷慶內大臣阿密達為總統在京副都統
拉哈吉勒塔布為兩翼領之尋授阿密達為揚威將
軍

庚戌獎諭平南王尚可喜

可喜奏逆賊吳三桂差奸細二人送書到臣臣
不勝髮指即擒執來使將逆書一併解送

上諭覽王奏逆賊吳三桂差人投送約結逆書王即將
差來奸細二人鎖拿解京併原書舉發具見王純忠
為國堅貞不渝屢著謨猷巖疆攸賴克副倚任之意
朕心深為嘉悅事平之日該部從優議奏

命禁耿昭忠等於家

上諭議政王等耿精忠背恩反叛耿昭忠耿聚忠雖與

吳應熊不同但係彼親弟國法亦難容縱著並禁於
一室其屬下官員俱著間住議政王等又請並禁其
諸兄弟

上從之

辛亥

命都統賴塔為平南將軍赴浙江

上諭議政王等副都統瑪哈達瑚圖部下兵及將軍華
善所分遣兵以都統賴塔為平南將軍赴杭州統領

勦禦瑪哈達瑚圖並同叅贊其杭州駐防官兵仍聽
將軍圖喇哈轄一切勦守事宜賴塔圖喇商酌以行
命副將軍哈爾噶齊帥師暫駐江寧

將軍希爾根等帥師之江西是日起行

上命副將軍哈爾噶齊前鋒統領覺羅舒恕領兵一半
先行暫趨江寧駐防俟內大臣阿密達等兵至仍赴
江西

癸丑大將軍順承郡王勒爾錦奏官兵敗賊於彞

陵

是月初八日偽將軍陶繼智偽總兵張權元等
自宜都率賊萬餘水陸來犯彝陵都統鄂鼐副
都統根特總兵官徐治都等率兵進擊斬賊甚
多獲船六十餘艘

甲寅

命選副將堪任總兵者

上諭兵部總兵官職任重大必得賢能方可勝任今員

缺甚多尚未得人著將副將內堪任總兵者開列具奏以備任用

宣諭從逆官員兵士

上諭兵部逆賊吳三桂反叛所在鎮守地方文武各官因兵單力微不能拒敵欲棄城來奔又懼國法難遁迫於不得已而附從者有之或為奸計訛言所搖惑無知而附從者有之今大兵齊集刻期剿滅逆賊盡絕根株朕念附從之徒皆朕赤子一時迷惑情非得

已恐大兵進勦概行誅戮朕心實為不忍若有能自悔前罪或獻城池或率兵卒或斬殺逆賊頭目獻其首級來投者俱行免罪給以原官仍論功議叙若愚頑武弁執迷不悟助惡不悛部下有心懷忠義之士或擒斬逆弁或約獻城池或率領黨類來投俱從優議叙授官給賞爾部通行曉諭

乙卯

勅諸路將帥大臣節核糧餉

上諭戶部各省用兵錢糧煩費其令出征王貝勒將軍
經畧都統經理錢糧大臣及所在總督巡撫等凡各
處軍需務期節省兵馬錢糧據實支散悉除浮冒

戊午蔡祿謀叛伏誅

內大臣阿密達領兵至懷慶擒獲蔡祿以

聞

上手勅諭之曰爾行未踰旬克濟厥事以遏亂萌朕心
深為嘉悅但人命關係最重須嚴審得實方可正法

毋得株連無辜至所俘人口散給士卒宜重賞被傷者以示鼓勵至是阿密達訛鞠得其謀叛實迹奏請上命將蔡祿父子并同謀者俱行正法尋

諭兵刑二部蔡祿係海上投誠之人念其來歸加以職銜給之世爵復優擢河南河北總兵官正宜殫竭忠忱力圖報効乃潛蓄逆謀欲應吳逆治甲練兵約期煽亂經坐塘筆帖式密報遣內大臣阿密達前往察勘並不出迎及入城至伊署輒敢施放矢礮拒敵因

其叛形顯著俱已收執奏請正法朕恐有冤誣復令
詳加審鞠據其兵丁家人口供俱稱蔡祿造烏鎗購
騾馬與楊來嘉往來同謀約應吳逆謀反情真即將
蔡祿父子并其姪蔡鼎席及同謀罪犯人等俱行正
法其餘投誠墾荒弁兵事無干涉者概不株連叛逆
法所必誅良善務加綏輯國有成憲軍民無得驚疑
爾二部即通行曉諭俾咸悉朕意

臣謹按河南密邇畿輔旁通秦晉齊楚諸境

乃四達之區也蔡祿叨居節鎮負恩思亂與
楊來嘉潛相構煽以應吳逆若撲滅不早則
中州騷動兵民為不寧矣

皇上一聞其狀隨默運神機夕發

諭旨命阿密達率兵以往質明即令啟行中外皆莫測
所以迨阿密達星馳至懷慶出蔡祿之不意
俾弗暇措手遂就執訊果盡得其反迹乃誅
祿父子撫定其一軍是役也師不踰旬民無

惶擾而亂萌銷遏大河南北安堵如故皆由
皇上之運籌至密而決策至速也

命訪海澄公黃梧等聲問

上諭兵部耿精忠反叛海澄公黃梧提督王進功隔越漳
泉與浙江聲問不通著平南王及兩廣總督廣東巡
撫江西巡撫浙江將軍總督等由廣東江西浙江設
法遣人於梧進功處確探消息若梧進功等能各守
地方令其固守倘力單不能自守廣東江西何處可

通著來會合

命副都統根特巴圖魯等領兵赴廣東

平南王尚可喜奏據報吳三桂遣賊兵二萬屯
劉黃沙河桂林兵民俱戴氍帽若孫吳二逆合
兵一處則勢益猖獗乞就近調撥大兵速來廣
東會同臣兵剿滅孫逆

上命副都統根特巴圖魯席布等俟將軍希爾根哈爾
噶齊等兵至江西即率所部官兵急赴廣東同平南

王尚可喜商酌以行尋授根特巴圖魯為平寇將軍
己未

勅江南總督提督防守崇明

浙江提督塞伯理奏耿逆交通吳逆結連鄭寇
沿海一帶皆可揚帆直入內地至江南崇明一
邑孤懸海外尤屬可虞

上諭浙江及江寧京口諸處俱已遣發大兵崇明一邑
雖云孤懸海外亦有重兵駐防但時方戒嚴著江南

總督提督飭令崇明鎮將嚴加警備倘有賊警總督
提督即會將軍額楚華善王之鼎等公同謀議守禦
接應

辛酉

詔削奪耿精忠官爵宣諭福建軍民

上諭兵部逆賊耿精忠庸懦無能癡愚寡識祇緣伊祖
耿仲明航海來歸

太宗文皇帝念其投誠之功特封王爵寵眷優隆

世祖章皇帝定鼎燕京復加委任令其統兵鎮粵中道殞
身其子耿繼茂叨恩承襲兩鎮巖疆恪恭職守朕眷
懷勲裔恩禮有加及其病亡尤深軫恤特遣部臣頒
賜勅諭俾耿精忠襲封王爵自伊祖父以及伊身受
恩三世四十餘年在精忠賴祖父之餘勲冒朝廷之
崇秩自宜感恩圖報殫竭忠誠不意包藏禍心潛謀
不軌乘吳逆之變輒行反叛煽亂地方罪惡昭彰國
法難宥今削其王爵遣發大兵進剿指日蕩平但念

其所屬官兵及地方官員軍民人等或被逆賊迫脅
雖懷忠義莫能自明恐大兵一到玉石難分有能擒
斬精忠投獻軍前者優加爵賞或以兵馬城池納款
者論功叙錄或力有不逮自拔來歸者亦免罪收用
其直隸各省文武官員人等有原係精忠所屬之人
概從寬宥雖有父子兄弟見在福建者亦不株連毋
得心懷疑畏自罹法網負朕好生之意爾部即速行
遍諭

癸亥


宣諭平南王尚可喜

時可喜屢奏調發官兵征勦逆賊復奏長江宜設舟師脩禦

上嘉之令兵部以分遣禁旅諸路調度情形移會可喜曰今寧南靖寇大將軍順承郡王及貝勒等率領大兵由常澧進平雲貴鎮南將軍尼雅翰都統珠滿巴爾布等帥師由武昌水陸進取岳長

直入廣西都統伊里布等帥師駐鎮彝陵都統
范達禮副都統德業立等帥師駐鎮鄖襄安西
將軍赫業副將軍瑚里布西安將軍瓦爾哈等
帥師由漢中進取四川副都統科爾崑吳國禎
等帥師駐防漢中鎮西將軍席卜臣等帥師駐
防西安復遣尚書莫洛經畧陝西等處帥大兵
居中調度鎮東將軍拉哈等帥師於山東河南
江南要地駐防安南將軍華善等帥滿洲漢軍

官兵同鎮海將軍王之鼎等於京口水陸駐防
楊威將軍阿密達等帥師同江寧將軍額楚等
防守江寧安慶沿江險要平南將軍賴塔帥師
由浙江平定福建浙江將軍圖喇帥師駐鎮杭
州兼防海疆定南將軍希爾根副將軍哈爾噶
齊等亦帥師由江西建昌廣信平定福建副都
統根特巴圖魯席布等帥師赴廣東會同該藩
進勦一切機宜參酌以行



平定三逆方畧卷五

欽定四庫全書

史部

平定三逆方略卷六至十

詳校官編修

臣

曹振鏞

編修

臣

裴謙履勛

總校官候補中書

臣潘有為

校對官中書

臣李斯咏

謄錄監生

臣

邵延曾

欽定四庫全書

平定三逆方畧卷六

康熙十三年五月申子朔設浙江馬站

上諭兵部大兵進勦閩逆凡奏報軍機止由水路恐致
稽遲自杭至衢令設馬站七處置筆帖式撥什庫以
便馳遞

戊辰

戎諭往駐兗州蒙古塔布囊等

先是

上命喀喇沁部落四等塔布囊霍濟格爾土默特部落
二等塔布囊善達等往駐兗州至是將行
上召見諭之曰昔

太祖

太宗定天下時爾等祖父曾同心效力朕體

祖宗撫愛爾等祖父之意恩典頻加念爾等生長朔方以
粵西諸路炎蒸故不遣往今特命鎮守兗州至彼須

節慎飲食凡有調遣聞命星馳朕遣爾等出師原為百姓爾等亦宜善加愛惜沿途毋有擾害至於設巡邏謹備禦軍旅之事凡百加慎勿得輕視輒生怠忽勉之

勅大將軍順承郡王勒爾錦遣兵援岳州

上諭勒爾錦等曰岳州水陸諸路兵力單弱王可於荊州所有甲兵每佐領內酌撥二三人以彝陵領兵大臣曾歷戰陣者一人統之各備甲冑鞍轡由水路速

援岳州如尼雅翰珠滿巴爾布等尚未破敵須俟援
兵到始可進戰非謂尼雅翰等不能擊賊正欲我軍
兵多力厚大敗賊衆挫其兇鋒耳范達禮等之兵足
守襄陽可令德業立等之兵暫往荊州駐守王貝勒
大臣身在地方自能諳曉機宜應行之事即聽爾等
裁酌如已得四川當分兵三路進取雲貴若逆賊將
士來降即赦前罪厚加恩養其以此播告江南廣為
宣諭至於賊兵各路來犯分我兵勢又每聲言渡江

狡情叵測我兵日久恐偵探踈懈雖無賊之處亦宜
加意隄防

庚午

命察捕奸究

上諭兵部逆賊吳三桂雖竊伏常澧不日授首但恐狡
賊計窮潛布奸細惑我愚民及本地奸宄借三桂之
名煽動人心擾害地方俱未可知爾部行文各省督
撫提鎮密察嚴捕毋得藉端擾害良民波累無辜

辛未

諭平南王尚可喜等戰守機宜

可喜奏孫延齡叛形昭著且自稱安遠大將軍
移牒平樂梧州諸府伏候

廟謨指授協力蕩勦以抒

皇上南顧之憂

上命可喜與總督金光祖提督馬雄等會同商酌如逆
賊孫延齡有可勦之勢即議進勦若未可速進則俟

大兵協力剪滅并令部臣傳

諭馬雄固守所屬相機滅賊儻賊盛難禦即率官兵赴
廣東與平南王總督等協守以俟大兵之至

壬申將軍赫業奏拔朝天關

赫業等統兵前進於四月二十八日抵七盤關
賊棄關遁是月初五日進至朝天關偽總兵石
存禮等率衆萬七千餘掘濠立柵連營相拒我
兵力攻三日賊敗走遂拔其關斬首七千有奇

丙子

命江寧京口等處滿漢官兵習水戰

將軍王之鼎奏耿精忠叛亂賊踪往來無定應
將分防江陰瓜州戰艦調集天寧洲令右路總
兵官率兵訓練以備戰守

上允之并將軍阿密達華善等以所統滿漢軍官并習
水戰

丁丑

命給寧夏總兵官陳福世職

時福舉首逆書

上嘉其忠因給拜他喇布勒哈番

庚辰

命經畧莫洛議進兵機宜

勅諭莫洛曰朕聞鄭蛟麟來降又聞克復朝天關深為
喜慰斯皆諸將軍謀畧項者岳州賊衆擁聚霖雨連
綿大兵不可直前俟雨霽風順即水陸並進吳三桂

果在澧州乘虛徑襲其後乃今日至要之機如克復
四川可疾由交水取貴州或徑取雲南其可否機宜
爾與諸將帥酌議密奏

壬午

命副都統拉哈領兵赴浙江

時將軍圖喇報平陽兵變總兵官蔡朝佐被執
總督李之芳等又奏逆賊曾養性至平陽與叛
將司定猷等會兵圍瑞安衢州一路賊兵屯聚

青海湖上賊踪出沒內地山寇復起現在標兵
四應不給乞調近省禁旅彈壓以保萬全

上諭將軍賴塔既抵杭州可與將軍圖喇總督李之芳
提督塞白理等會商平陽衢州等處緩急機宜猶恐
勢分力薄其以駐劄江寧將軍阿密達所轄包衣佐
領官兵令副都統拉哈悉領赴浙聽賴塔調度又以
駐劄兗州將軍拉哈達所轄喀喇沁土默特兵千人
令副都統穆赫林領赴江寧聽阿密達管轄

甲申加甘肅總兵官孫思克西寧總兵官王進寶

職銜

上諭兵部總兵官孫思克王進寶俱効力邊疆其優加
孫思克三等授為右都督加王進寶一等授為署都
督僉事仍管總兵官事

丁亥平南王尚可喜奏劉進忠以潮州叛

潮州總兵官劉進忠陰通耿逆於四月二十日
叛變擁兵與續順公沈瑞兵戰二十三日遂引

閩賊入城

己丑

獎諭平南王下將士及廣東官兵

上諭兵部平南王尚可喜累朝勲舊久鎮巖疆勞績懋著自吳逆等叛後復能篤守忠貞殫心籌畫屢抒謀畧保固疆圉事平優叙已有前旨其藩下官兵及粵省文武官員兵士皆能協力同心克効忠順防禦逆賊勞瘁行間朕心時切軫念事平之日俱從優叙賞

爾部即速傳諭俾咸悉朕意

癸巳

命平南王尚可喜等宣諭廣西官兵

上諭可喜及總督金光祖提督馮雄曰叛逆孫延齡奏稱督提二臣誘臣下都統王永年等謀為不軌暗託腹心掘通城塹密約日期内外交攻謀殺臣身并戕害城中百姓事發兵變遂將王永年等剪除等語孫延齡交通逆賊吳三桂反叛復以巧計離間居臣飾

辭具奏然延齡雖叛爾廣西所有官兵原隸定南王
先因定南王為國盡節邊疆將所屬官兵離散家口
收合一處使之完聚復因王無襲嗣以王女配延齡
授為將軍統轄兵馬今延齡雖背恩作亂念其下官
兵原隨定南王効力建功國家累世養養恐大兵一
到概行誅戮朕心不忍前有旨如延齡改過來降寬
宥其罪爾等不可因此遂緩進勦機宜必延齡果悔
罪歸誠爾等仍受降具奏其所屬官兵感念國恩或

殺延齡或率衆來歸俱從優議叙即隻身自投亦收
留恩養仍出示曉諭定南王下官兵俾悉此意

平定三逆方畧卷六

欽定四庫全書

平定三逆方略卷七

康熙十三年六月甲午朔

命兵部宣諭耿精忠

上諭兵部耿精忠之祖仲明於

太宗文皇帝時航海歸誠優錫王爵効力行間勞績茂著
及其身故默勒根王不令承襲

世祖章皇帝追念舊勲特允其子繼茂仍襲王封令兩鎮

巖疆為國藩屏爰及朕躬惓懷勲裔恩寵有加後覽其病終遺疏有地方兵民凋敝賊寇未滅死不瞑目等語忠義肫篤深切軫念且因繼茂之子精忠自幼曾為近侍予襲王爵仍鎮閩省朕以精忠必能紹祖父遺訓殫竭忠猷無忝先烈乃不意近為逆賊吳三桂誘惑煽亂地方棄累世之忠貞構一旦之狂悖既干國法復墜家聲朕猶念其祖父前功精忠係一時無知墮人狡計與吳三桂不同故將三桂子孫正法

精忠在京諸弟照舊寬容所屬官兵並未加罪今湖
廣遣寧南靖寇大將軍順承郡王統領大兵由湖南
進勦雲貴鎮南將軍尼雅翰統領大兵由廣西進勦
雲貴安西將軍赫業及西安將軍瓦爾喀等統領大
兵已攻克七盤朝天等關直抵保寧刻期底定全川
並勦雲貴吳逆指日授首定南將軍希爾根統領大
兵由江西進勦福建平南將軍賴塔統領大兵由浙
江進勦福建平寇將軍根特巴圖魯統領大兵由廣

東進勦福建又遣揚威將軍阿密達鎮西將軍席卜
臣安南將軍華善鎮東將軍拉哈達等各統領大兵
駐劄江南京口等處調度征勦精忠殲滅亦在旦夕
但念其祖父宣力累朝洎精忠之身遽至覆亡宗祀
斬絕朕心深為不忍且吳三桂乃本身投誠之人背
恩反叛自取誅戮精忠祖父以來受恩三世四十餘
年非素蓄逆謀首倡叛亂者比爾部即傳諭精忠果
能追念累朝恩德及伊父忠蓋遺言革心悔禍投誠

自歸將侵犯內地海賊速勦圖功即赦免前罪視之
如初朕以至誠待天下必不食言俾其善自審度勿
負朕保全勲舊之意爾部即遵諭速行傳知於是兵
部奏遣工部郎中周襄緒及耿精忠下一等護
衛陳嘉猷賁

勅赴福建尋又

諭將軍賴塔圖喇總督李之芳巡撫田逢吉提督塞伯
理曰耿精忠作逆蹂躪地方大千國法已遣發大兵

於浙江江西廣東三路進勦但念其祖父曾宣力累
朝洎精忠之身遽至覆亡宗祀斬絕朕心殊為不忍
因遣周襄緒陳嘉猷賁勅往諭如精忠悔禍乞降赦
免前罪仍思遇如初爾等不可因此遂誤進勦機宜
必精忠果請罪輸誠爾等即受降來奏若仍執迷肆
逆不悛其藩下官兵有心存忠義者或擒斬精忠或
率衆來降俱優加恩賞即隻身自歸者亦收留撫恤

庚子

命戶部侍郎達都往浙江督理大兵糧餉

勅之曰茲以大兵進剿閩逆軍需浩繁職任重大必須
專官綜理始克允濟特命爾前往浙江總理大兵糧
餉兼管地方兵馬一切事務凡事與總督商酌而行
有闕提鎮者亦與商酌文官布政使以下武官副將
以下俱聽爾節制各官有能安輯地方撫綏百姓不
誤糧餉者聽爾題叙獎勸如官箴有玷廢弛職掌苦
累百姓輓輸稽遲者即行叅奏大兵糧餉當預為辦

理毋致臨時有誤仍綜核出入嚴察虛冒簡閱兵馬
整飭營伍相機調遣有應與將軍等商酌之處仍與
平南將軍杭州將軍商酌凡有關於地方一切事務
俱盡心料理勅中開載未盡之事聽爾便宜區畫爾
膺茲重寄務持廉秉公攄志殫忠俾軍儲充裕民生
乂安地方綏靖斯稱委任倘因循怠忽或措處乖方
致誤重任責有所歸爾其慎之

詔叙賚彝陵有功將士

上諭兵部吳逆作叛以來湖南綠旗官兵降賊者衆惟
龔陵總兵標下官兵克篤忠貞堅守地方近復兩戰
龔陵奮勇擊賊勞績顯著若俟事平議叙則効力之
士不得早沾國恩可即行叙賚以示鼓勵

癸卯

命將軍根特巴圖魯等帥師定廣信進取長沙

巡撫董衛國奏叛弁柯昇勾連閩逆竊據廣信
諸處麻棚地方賊兵繼起

上諭將軍希爾根等至江西時根特巴圖魯等可先定
廣信護軍統領察哈泰原令進兵荊州今改赴江西
為希爾根參謀到日希爾根于所領兵內每佐領出
驍騎三人付前鋒統領舒恕率領與根特巴圖魯合
為之參謀由袁州進取長沙夾勦逆賊根特巴圖魯
等進取長沙日期須豫啟順承郡王知悉將拉哈達
所統每佐領兵一人亦令副都統幹都海率往江西
與希爾根兵合參其軍務

甲辰

命總理糧餉左都御史多諾等供應湖南軍需

上諭多諾等曰前遣爾等督理湖廣通省糧餉今聞岳
州兵馬草豆匱乏爾等可分一人前往武昌備辦曩
當太平之時湖北湖南巡撫二人分治今軍興之際
不得仍以地方分屬為諉爾等會同湖北巡撫張朝
珍即選才能官員備辦軍需無致缺乏岳州馬匹倘
有不足可將順承郡王軍前馬量為撥給又王師渡

江或取宜都等處所需舟艦當于荊州預造百艘其
作何造辦及需用工費詳議以聞

丙午調襄陽兵駐防蒲圻

上諭兵部大兵進取岳州自岳至武昌中途應設滿兵
防守前自懷慶赴襄陽每佐領護軍一人即令其護
軍參領噶爾弼為副都統帥往與湖廣巡撫會議併
量帶綠旗兵赴蒲圻縣駐守

命多羅貝勒尚善為安遠靖寇大將軍帥師赴岳州固

山貝子準達等帥師赴荊州

上諭議政王等逆賊吳三桂今于澧岳諸處抗拒我師
且用奸謀搖惑軍民之心分我兵勢宜增兵速行剿
滅今令八旗每佐領出驍騎二人併派察哈爾護軍
驍騎一半又蒙古四十九旗內與京師稍近者如科
爾沁十旗教漢一旗奈曼一旗克什克騰一旗歸化
城二旗共出兵萬人以旗下兵之半及蒙古兵六千
令固山貝子準達率往荊州散秩大臣多謨克圖為

署都統參贊準達軍務又以旗下兵之半及蒙古兵
四千以多羅貝勒尚善為安遠靖寇大將軍同固山
貝子彰泰鎮國公蘭布率往岳州所調蒙古兵俱限
八月初一以前至京擇蒙古貝勒以下領之尋理藩
院以蒙古貝勒貝子公台吉等列名奏請

上命科爾沁輔國公圖訥赫杜爾伯特部落台吉溫布
赴荊州巴林部落貝子溫春台吉格呼爾圖赴岳州

庚戌

命副都統吉勒塔布領兵赴浙江

提督塞伯理奏總兵官祖宏勳以溫州叛

上命駐江寧副都統吉勒塔布率右翼察哈爾全軍及
每佐領甲兵一人赴浙江會同提督塞伯理守禦將
軍拉哈達所轄蒙古兵悉令署副都統宗室巴爾堪
率赴江寧聽將軍阿密達統轄松江乃海口要衝且
與浙江連接阿密達額楚等可密咨提督楊捷若以
松江可虞即酌遣滿洲蒙古官兵以副都統一人領

赴松江與提督協守在京滿洲蒙古每佐領出驍騎
一人漢軍每佐領二人以精奇尼哈番碩塔一等待
衛穆森署副都統偕漢軍都統釋迦保領之前赴充
州與將軍拉哈達會議行事

辛亥

諭將軍尼雅翰等進兵機宜

上遣侍衛二格賚諭諭尼雅翰等曰爾等咨兵部稱馬
多羸斃積雨弓輟朕慮此時進兵未便恐爾等以頓

師日久懼罪夫以千里之外軍勢曲折知彼知己豈
可逆料朕不欲速惟圖萬全爾等俱係大臣聽謀畫
以行其軍中情形及俘獲賊兵言賊進止之狀併爾
等所見俱密行陳奏尋尼雅翰等奏六月十七日投
誠偽守備薛麟兆等言吳三桂遣偽護衛至岳
州令賊將堅守且趨進兵賊將稱待長沙造烏
機船到時水陸入犯又言賊營缺餉全賴長沙
水陸運送長沙守兵不多臣等議俟秋涼相機

進取

壬子

命將軍拉哈達赴杭州鎮守

時杭州將軍圖喇以患病還京

上命拉哈達移鎮杭州代圖喇掌將軍印務領其兵馬
及自京所遣漢軍官兵其鎮東將軍勅印留付護軍
統領察哈泰即令管理兗州官兵其往江西兵令署
副都統公沃赫穆成額領赴將軍希爾根軍前因

諭拉哈達曰鎮守杭州將軍圖喇因病罷任今浙江當多事之秋杭州諸處殊為要地以爾素有才能遣往暫理杭州將軍事務爾抵杭州可與副都統瑪哈達雅塔里侍郎達都等會同商酌務期固守封疆撫恤將士收拾軍民之心以副朕委任之意復

諭拉哈達及賴塔曰爾等皆國家股肱大臣委任封疆重務凡事須商確者移會關通協心謀畫以副朕委任之意勿各執己見慮有貽誤務念國事為重用茂

厥績

命經畧莫洛遣兵守朝天關諸路

上諭莫洛曰朝天關諸處關係要害可於滿洲漢軍或
綠旗官兵內酌撥防守為犄角之勢糧艘至彼遞相
護送不為無助至漢中雖有滿兵猶恐力單且朝天
關之外尚有別路可通漢中儻我兵深入後奸宄竊
發據守鷄頭關諸險亦屬可虞一切機宜爾當酌量
以行又念保寧未能即得則我師益致勞頓輓運糧

餉實為要務其源源接濟毋令匱乏
命副都統巴喀領兵赴順承郡王軍前

先是

上命經畧莫洛遣副都統科爾崑進四川馬一豹赴漢
中將軍席卜臣提督王輔臣俱赴荊州至是莫洛奏

稱科爾崑官兵已遣赴廣元總督周有德軍前
馬一豹官兵已遣赴漢中副都統吳國禎軍前
席卜臣則令率每佐領護軍一人往漢中總統

馬一豹吳國禎等之兵以副都統巴喀率每佐
領驍騎一人同提督王輔臣往荊州

上諭貝勒貝子等既率八旗及蒙古兵赴楚王輔臣兵
不必發荊州或令輔臣從將軍赫業等進取保寧或
仍駐平涼聽莫洛酌遣巴喀即率兵赴順承郡王軍
前尋莫洛又奏逆賊固守保寧且廣元所屬百丈關
諸處賊衆盤踞恐科爾崑兵力單薄隨令副都
統吳國禎俟馬一豹兵至即率官兵前赴廣元

癸丑

調廣東兵援柳州

提督馬雄奏孫延齡逆衆不下萬五六千人臣

雖堅守柳州衆寡不敵祈令大兵速進應援

上諭柳州乃廣西要地馬雄既堅守請援速行平南王

尚可喜總督金光祖酌發廣東兵前往接應如有機

會聽平南王與提督會商進剿

戊午

命山東提督段應舉領兵赴浙江將軍賴塔帥師進福

建

將軍圖喇奏杭州兵單請增兵協守

上諭撥京口將軍下綠旗官兵三千江南提標官兵二

千調山東署提督事副都統段應舉率赴杭州仍聽

將軍拉哈達節制段應舉既赴浙江將軍賴塔可帥

所轄滿兵及綠旗兵五千進平福建

命和碩康親王傑書為奉命大將軍帥師赴浙江多羅

貝勒洞鄂為定西大將軍帥師赴四川

上諭議政王等浙江四川兩路宜遣王貝勒貝子公等
前往勦賊所以遣王等非以諸將才能不足念諸王
貝勒皆朕懿親指揮調遣無所牽掣守禦征勦足增
威重可授和碩康親王傑書為奉命大將軍同固山
貝子傅喇塔率前鋒一百七十六人每二佐領合出
護軍一人赴浙江又前調赴荆岳蒙古兵令各分一
千人隨王至江寧時將此兵留駐更調駐守江寧喀

喇沁土默特兵同赴浙江授多羅貝勒洞鄂為定西
大將軍同固山貝子都統溫齊輔國公綽克託率貝
子準達所領驍騎之半赴四川其遣往王貝勒貝子
公下包衣佐領多者甲士酌量帶往包衣佐領少者
以間丁酌量披甲帶往至王貝勒所駐地方將軍在
王軍前則將軍印不用如別將兵各用其將軍印尋

又

諭兵部貝勒尚善等至岳州將軍尼雅翰都統珠滿巴

爾布護軍統領額司泰仍參贊軍務康親王傑書等
至浙江將軍賴塔副都統拉哈吉勒塔布仍參贊軍
務貝勒洞鄂等至四川將軍赫業瓦爾喀護軍統領
瑚里布署前鋒統領穆占副都統佛尼勒仍參贊軍
務其餘俱罷參贊

辛酉

勅浙江諸將固守台寧

提督塞伯理奏溫州屬樂清等營相繼降賊黃

巖總兵標下太平營亦叛賊兵離黃巖止七八
十里請速發大兵保守沿海邊地

上諭樂清等營既相繼降賊則台州寧波可慮副都統
拉哈所率包衣佐領兵且勿赴將軍賴塔軍前留駐
杭州副都統吉勒塔布及拉哈之兵俱聽將軍拉哈
達侍郎達都同議調遣保守台寧等處俟段應舉兵
到令其固守地方拉哈兵及副都統瑪哈達兵仍會
賴塔相機以行康親王固山貝子至時賴塔拉哈達

聽王等指揮調度

平定三逆方畧卷七

欽定四庫全書

平定三逆方畧卷八

康熙十三年七月丁卯

命提督張勇嚴飭邊防

上諭張勇曰邊陲重地恐奸宄竊發卿乃封疆大臣朕所簡任可率所屬總兵等官固守地方有妄行為亂者嚴行緝治以副朕倚任股肱之意

癸酉

金史卷八
命江南綠旗兵習水戰於黃浦江

先是將軍王之鼎疏稱耿逆潛通海寇煽亂地方沿江沿海亟宜熟籌勦禦請於崇明沙船一百艘留三十以備巡邏餘盡泊黃浦江遣滿洲漢軍兵配綠旗兵操演以備策應奏入

上勅將軍阿密達等公議酌行既阿密達等疏稱江南松江黃浦一帶現無警息若撥滿洲漢軍往駐則沿途百姓有供億之累派取民房居住則土

著之民有失業之虞請止撥綠旗官兵不時練
習若黃浦江諸處有警相機應援

上允之

命大將軍貝勒洞鄂等各率所部速進四川

經畧莫洛奏言大兵在保寧與賊相持恐運餽
日久秦民必致疲苦臣今親赴漢中酌量分路
進發貝勒洞鄂等若率衆盡行慮致遲滯請

勅貝勒洞鄂以所將驍騎併入康親王軍內自率所部

輕騎赴西安旋進四川

上諭洞鄂部下無多所將驍騎既入康親王軍內輕騎并
入川兵力單薄可令貝子公等亦各率所部輕騎并
力前進

楊富謀叛伏誅

時南瑞總兵官楊富隱匿在官盔甲私置竹礮
器械暗招閩兵千餘練習滾牌與賊潛通謀為
內應江西巡撫董衛國與將軍希爾根等密商

於是月十一日以計擒之即時伏誅

乙亥

命將軍希爾根等固守贛州袁州

先是巡撫董衛國奏閩賊出犯杉關新城失守

至是又奏賊攻破石城聲犯寧都

上諭贛州乃八粵孔道將軍希爾根巡撫董衛國等務
會同商酌固守之策併趣副都統幹都海署副都統
公沃赫等速赴江西復

諭兵部袁州與湖廣接界亦屬要區可令將軍希爾根
哈爾噶齊根特巴圖魯等協心商酌守禦之策務期
保固尋以袁州副將趙應奎為袁臨總兵官駐防袁
州

丙子

命副都統喇哈領兵速赴衢州

總督李之芳疏奏賊兵合力來犯衢州臣標兵

單可虞請

勅副都統拉哈統兵亟進以壯聲援

上諭拉哈兵不必留駐杭州速赴衢州與將軍賴塔并
力勦禦將軍拉哈達侍郎達都副都統瑪哈達雅塔
里等仍駐杭州防守副都統吉勒塔布之兵視何處
警急即往應援

戊寅

命平南王尚可喜等備交趾

總督金光祖奏交趾知孫延齡叛逆乘機蠢動

陳兵邊界其情叵測請加防禦

上勅平南王及總督提督等嚴飭邊將不時偵察仍增官兵防守險隘

壬午

命副都統伯穆赫林率喀喇沁土默特兵速赴浙江先是

上命副都統蘓朗署副都統額思赫率蒙古兵二千之江寧即留付將軍阿密達令之駐防其原駐江寧喀

喇沁土默特兵令蘇朗等率赴浙江至是浙江賊寇
蜂起衢州告警將軍拉哈達奏

聞

上諭衢州正在危急令副都統伯穆赫林率喀喇沁土
默特兵自江寧速赴浙江與將軍拉哈達等會同剿
禦副都統蘇朗等仍率蒙古兵鎮守江寧將軍拉哈
達賴塔侍郎達都總督李之芳既同任勦撫之事一
應軍務須公同商確毋分彼此如浙地何處有警即

相機應援

命平南王尚可喜等固守梧州諸處

總督金光祖奏梧州失陷我兵據守梧州

上諭將軍根特巴圖魯等兵由袁州取長沙進廣西以襲賊後則取道廣東必致遲久可令平南王尚可喜總督金光祖提督馬雄會同酌議添發官兵規取梧州否則固守梧州諸處相機勦禦

命經畧莫洛等措置進川官兵機宜

將軍瓦爾喀等奏征四川總兵官王懷忠標兵
因餉匱逃散今欲勦賊兵力單薄運餽不至乞
發兵救援

上諭康親王傑書及貝子準達所部驍騎俱令貝勒洞
鄂率之以行其大兵或仍據壕塹圍守保寧或因糧
運艱難暫還廣元令經畧莫洛將軍瓦爾喀等公同
商酌王懷忠標下逃兵姑寬其罪應如何撫納亦令
莫洛商酌速行

丁亥大將軍順承郡王勒爾錦奏官兵敗賊于岳
州

是月十一日貝勒察尼將軍尼雅翰等分部滿
漢官兵水陸齊發進攻岳州偽將軍吳應麒等
率賊七萬餘列鹿角牌銃陸路相拒我兵奮擊
大敗之斬首萬級舟師抵七里山以礮攻賊沈
其船十餘艘

己丑大將軍康親王傑書帥師之浙江大將軍貝

勒洞鄂帥師之四川

先是傑書奉

命征討侯調蒙古兵到同發至是傑書奏浙江告急宜
速往援若俟蒙古兵同行恐稽時日請率兵先
往

上遂命於是日啟行洞鄂亦同日率兵之四川

辛卯

詔收葬耿精忠祖父骸骨

上諭兵部耿精忠雖背恩反叛其祖父投誠効力累世
舊勲朕豈以精忠之罪及其先人大兵平定閩省之
日其祖父骸骨仍許收葬

八月癸巳

命給大將軍等分兵印信

上諭兵部諸路大將軍止各給一印儻分兵赴剿別無
印信則招撫賊寇宣諭百姓及調遣防守地方兩軍
移會機宜何以為憑其再給大將軍順承郡王勒爾

錦印二至大將軍康親王傑書處有將軍賴塔印一
再給印一大將軍貝勒尚善處有將軍尼雅翰印一
再給印一大將軍貝勒洞鄂處既有將軍赫業瓦爾
喀印二不必另頒若分兵他往即以所頒印信付統
兵者復合一處則收回所頒止用大將軍印

命科爾沁公圖訥赫嚴禁兵卒

上諭圖訥赫曰我

太祖

太宗以來爾祖父同心効力佐定天下爾國賦稅聽爾自
取若爾國窮困朕加意撫養今聞調至爾所屬兵卒
有掠取民物者在京尚如此况離此遠去豈不益肆
搶奪爾久歷行間務宜嚴禁兵卒毋得恣行強橫如
有亂法者即會同貝勒議行懲治且中夏炎熱爾衆
早晚飲食各宜自慎以副朕軫恤軍士之意

命將軍希爾根調署副都統公沃赫兵赴江西

巡撫董衛國奏饒州營兵變餘千賊勢猖獗

上命將軍希爾根速調公沃赫兵赴江西同副將軍哈爾噶齊巡撫董衛國提督趙國祚商議勦滅賊寇平定地方仍檄江南總督阿席熙安徽巡撫靳輔於饒州接壤所在增設官兵嚴加防守

甲午大將軍貝勒尚善等帥師之岳州貝子準達等帥師之荊州

乙未

命總督蔡毓榮率所部兵協同大兵進勦湖南

上諭兵部王師進勦湖南須用綠旗官兵總督蔡毓榮
管轄通省可率所部兵隨王師協力平定地方又荆
州地關緊要進兵時大將軍順承郡王勒爾錦宜酌
撥官兵防守

丁酉

諭福建總督郎廷佐勦撫機宜

郎廷佐奏耿逆背叛勾連海寇虛張聲勢但海
寇止習水戰陸地非其所長宜勦撫兼施乘機

底定

上諭廷佐入閩之日海寇宜用撫精忠宜用勦或用間
相機便宜以行

壬寅

命海澄公黃梧子芳度襲其父爵

時芳度遣官黃藍間道奏稱臣父於本年三月

二十六日病故臣不得已權以父命送勅印賊
處仍密行招募合舊兵共得六千餘人六月初

四日斬偽城守都督劉豹等三人拒守漳州惟望大兵入閩救應臣偵知來路隨往迎接

上諭海澄公黃梧自海上歸誠殫竭忠藎鎮守巖疆勞績茂著據奏於三月二十六日病故朕心深為軫惻應得恤典從優議奏黃芳度設計全城招集兵卒斬偽都督劉豹等三人固守地方以俟大兵具見芳度能繼父志克篤忠貞殊為可嘉芳度應令襲公爵今大兵由浙江江西廣東三路進閩芳度偵何路兵先

到即來迎會既芳度兄一等侍衛芳世自陳生長閩地深知道里情形乞隨大兵進剿救援伊弟芳

度

上因授芳世為隨征福建總兵官令同平南王尚可喜

兵進剿福建

命副將軍哈爾噶齊為平寇將軍

時平寇將軍根特巴圖魯卒於軍副都統席布

以

聞故有是

命

命治理歷法南懷仁製火礮

上諭南懷仁曰大軍進勦亟須火器爾可鑄造火礮務
加意精工俾越山渡水輕便利用于是南懷仁多造
木礮等火器陸續解送軍前以資征勦之用

甲辰增陝西綠旗官兵

先是經畧莫洛以秦省兵單請添設綠旗兵萬

餘以資戰守

上諭增兵必須增餉國家錢糧止有此數茲大兵進剿
浙江江西湖廣需餉浩繁爾經畧所知前因餽運不
給以致王懷忠等兵逃散秦民供億入川兵餉已極
勞苦若增兵萬餘貝勒經畧又統諸軍深入萬一糗
糧難繼恐禁旅有匱乏之虞而綠旗兵復蹈前轍矣
經畧身在地方洞悉情形或不煩增兵即親行入川
或必須議增方可進發或以秦省重要不必親行遙

措兵餉其逐一詳議以聞至是莫洛奏陝西舊兵內
王懷忠所率四千悉已逃散今王輔臣又率二
千以行除此六千外所增無多蓋增則戰守調
遣均有裨益陝西得以保固故臣以為增之便
若四川速定則錢糧有資而秦民又得息肩臣
仍宜親統官兵協力進剿平定四川疏入下議
政王貝勒大臣集議悉如所請行

上允之

已酉

命將軍賴塔等勦禦寧海諸路賊

提督塞伯理奏黃巖圍困請援甚急又寧海象
山新昌餘姚四縣賊衆蜂起恐賊竊踞寧海斷
我糧道請速救台保寧

上諭黃巖危急杭州將軍拉哈達已發兵赴援今大將
軍康親王已領兵赴浙無庸別遣其寧海等處賊衆
作何勦滅并救台保寧之策康親王未到之先聽將

軍賴塔拉哈達等商酌以行

庚戌申飭蒙古官兵

上諭公圖訥赫等近聞蒙古兵違法擾掠其嚴加禁飭
嗣後有不遵紀律者自驍騎校以下即審明正法

辛亥

諭護軍統領桑格進兵機宜

時桑格參贊江西軍事

上手勅諭之曰江右為粵東咽喉江浙唇齒所關綦重

今兵民之心或懷兩端若不先滅地方小醜大兵難
以前進至袁州吉安贛州尤屬要地若有失陷則廣
東聲息必至梗阻廣東梗阻則勢益危急今令滿兵
駐袁相機進取長沙否則固守地方庶三府可保無
虞將軍當親統重兵以行毋使兵力單薄致有疎失

臣謹按吉安贛州南通嶺外而袁州與湖南
接壤乃逆賊必爭之地均關要害

皇上預料賊必來犯若守袁州既可為吉贛聲援又可

以內捍西江外畧南楚乃密授桑格以戰守
機宜復命將軍等統重兵往駐未幾逆賊果
侵軼袁州賴茲兵力大創其衆于西村之地
江西得以保固而大兵亦長驅無梗直抵長
沙

皇上先機洞察誠所謂坐照如神者也

己未

命將軍尼雅翰帥師由江西規取長沙岳州

上諭議政王等聞岳州三面臨湖賊于陸路一面浚壕築壘拒守頗堅難以進取應令將軍尼雅翰率兵沿流赴江西與副都統幹都海兵合併率表臨總兵官趙應奎由袁州進復長沙夾攻岳州相度便宜以行

平定三逆方畧卷八

欽定四庫全書

平定三逆方畧卷九

康熙十三年九月壬戌朔

命將軍額楚等帥師赴徽州

總督阿席熙奏饒州逆賊犯徽州婺源縣

上諭徽州浙江接壤要地將軍額楚署副都統宗室巴爾堪等於揚威將軍所統驍騎并江寧將軍所轄兵內酌量率赴徽州堵剿逆賊署副都統碩塔穆森以

鎮守兗州滿洲蒙古驍騎移駐江寧更發京師滿洲
蒙古每佐領驍騎一人以正藍旗王府長史雅賴正
黃旗一等侍衛阿喀尼為署副都統率之往駐兗州
命將軍哈爾噶齊帥師赴袁州

巡撫董衛國奏吳逆偽將軍二人率猱猱數千
來犯長沙糾集羣盜聲震袁臨窺伺江西已入
袁州境內

上諭袁州距吉安不遠吉安贛州又通粵要路今賊入

袁境將軍希爾根等停勦撫建諸賊以兵分與將軍
哈爾噶齊率赴袁州與總兵趙應奎併力勦禦其希
爾根所餘兵馬或進勦撫建或固守南昌相機以行
尋衛國又奏賊陷都昌

上復諭將軍希爾根巡撫董衛國提督趙國祚等速行
勦滅江南總督阿席熙安徽巡撫靳輔嚴飭接壤將
弁加意防禦

乙丑調署副都統碩塔等兵赴安慶

先是令碩塔穆森率師赴江寧至是因總督阿
席熙奏賊逼祁門

上乃命碩塔等徑趨安慶駐防尋又調河南提督王永
譽為安徽提督率所部兵以往

戊辰

命大將軍順承郡王勒爾錦詳議進兵機宜

上遣侍衛烏丹塞瑚立傳諭勒爾錦曰朕手諭與王者
再所言似合機宜又兩遣侍衛往未見王回奏滿漢

兵宜加撫恤餽餉亦不易若何進戰一在於王今所
在蠢動豈不可虞大將軍出征進止調度必待中旨
於古未聞因王等與賊相持朕不自暇逸屢有勅諭
冀或有一當耳非朕欲從中制也王等始出兵時兵
亦不為不足今四路進討王亦知之四川兵取朝天
關陽平關在保寧與賊相拒與岳州同王等勿以四
川兵將抵貴州湖南兵可緩進保寧較岳州城更堅
也康親王進勦閩賊雖屢奏捷朕不為喜吳三桂乃

賊渠惟破岳州澧州方可喜耳王等初至軍言馬未肥又言天熱多雨難行今當可行之時王等規取岳州或渡江取澧州或令都統尼雅翰往江西取長沙此三事王與貝勒諸將帥熟議以聞勿惟朕諭與議政大臣之議是從勉建良策欣聞捷音

臣謹按扼險據要制勝之上策

皇上深鑒乎此以岳州諸處地屬雄峻屢命諸將速往據守以遏賊鋒乃諸將不能奉行

睿算遂使形勝之地反為賊有至是

上念三桂為逆徒渠首澧岳實荆楚咽喉必先取澧岳
滅三桂則羣賊自望風而潰故既以

手勅諭勒爾錦用兵方畧又遣侍衛傳

旨令其相機規取澧岳長沙諄詳委曲切中機宜藹如
春溫凜如秋肅勒爾錦等果能仰遵

成畫尅期前進則諸路悉平賊氛迅掃矣乃竟觀望不

前坐失機會迨

詔旨屢趨猶逗留如故俾逆賊得為固守之計曠日持
久糜餉勞師皆勒爾錦等不奉

廟謨之所致也

己巳

命經畧莫洛等進兵廣元規定四川

莫洛奏臣於本月十一日由秦州進川貝勒等
到西安時養馬繼發請

命四川總督周有德巡撫張德地副都統科爾崑等固

守朝天廣元諸處轉運大兵糧糗并

敕將軍等拒守保寧以待大兵之至

上諭經畧莫洛身在地方軍機緩急自有確見令與將軍席卜臣前往廣元進取昭化疏通糧運平定四川總督周有德巡撫張德地副都統科爾崑等於經畧未到之先將廣元所有糧米運送軍前又廣元兵少甚屬可虞或令席卜臣兵先赴廣元秣馬以待或候經畧同發俱令莫洛酌行是日又

諭鄱嶺大二郎小二郎諸處俱係險要周有德張德地
科爾崑等酌撥官兵固守勿俾賊兵斷我後路若廣
元兵單未便分撥即移會莫洛席卜臣酌量調度

癸酉

命署副都統雅賚等領兵赴江寧

總督阿席熙奏徽州府及歙祁門等縣陷賊江
寧將軍額楚於本月初七日率兵赴徽州進剿
上諭江寧所駐大兵將軍額楚既率赴徽州江省係水

陸要地即令署副都統雅賚阿喀尼等停往兗州率
兵徑赴江寧其駐劄兗州漢軍都統釋迦保俟京師
新發禁旅到日亦率兵速赴江寧在京滿洲蒙古每
佐領驍騎一名每翼委署副都統一員漢軍每佐領
發兵二名共派副都統一員每翼委參領一員率赴
兗州駐劄尋以一等侍衛諾敏長史岳爾多為署副
都統并遣漢軍副都統孫承祖率兵以往

戊寅

命大將軍康親王傑書先定溫州黃巖諸處

提督塞白理奏黃巖失陷總兵阿爾泰從賊

上敕康親王傑書先勦滅浙省溫州黃巖諸處賊寇平
定地方然後進勦福建

命將軍尼雅翰等赴援袁州進取長沙

將軍希爾根奏吳逆遣賊來犯袁州耿逆竊踞
廣信等府今若分兵應勦恐兵單不利

上諭署副都統碩塔穆森不必駐皖速赴南昌到日令

署副都統穆成額率南昌兵速赴袁州與總兵官趙應奎并力固守署副都統公沃赫救進賢兵回日亦赴袁州若大兵未到之先賊勢猖獗趙應奎相機退保險隘以待大兵之至將軍尼雅翰將所率江寧兵及碩塔穆森兵酌量率赴袁州統領副都統幹都海沃赫穆成額等兵平定袁州進取長沙如吉安無警其幹都海兵聽尼雅翰調度酌遣又安慶係要地漢軍都統釋迦保署副都統雅賚阿喀尼俱率兵速赴

安慶并趨提督王永譽刻期抵任如安慶等處有警
令將軍阿密達華善等相機救應

己卯

命和碩簡親王喇布為揚威大將軍帥師赴江寧侍衛
坤巴圖魯為振武將軍帥師赴汝寧

上諭議政王等江南天下要地兵力單薄其授和碩簡
親王喇布為揚威大將軍派兩佐領合出護軍一人
上三旗包衣佐領兵每旗百人復令簡親王除伊包

衣佐領全軍外將所部人衆酌選披甲率往江寧統轄將軍阿密達兵及江南滿洲蒙古漢軍相機調度保固全省將軍阿密達額楚華善王之鼎總督阿席熙並同參贊又河南地廣兵少恐奸宄乘間竊發令每佐領出驍騎二人授侍衛坤巴圖魯為振武將軍率赴汝寧駐防左翼遣副都統覺羅夸代右翼以長史阿爾瑚為署副都統偕行尋又

諭簡親王到江寧時令副都統蘇朗率蒙古兵一千往

鎮安慶其安慶都統釋迦保率所部漢軍速赴南昌
鎮守到日南昌署副都統碩塔穆森兵前往袁州會
合將軍尼雅翰等兵與總兵官趙應奎合力勦禦若
蘇朗兵到安慶時署副都統雅賚阿喀尼率所部兵
亦速赴南昌鎮守

甲辰將軍希爾根奏復撫州

是月初七日夜逆賊來犯我柵我兵分路迎擊
敗之于十一日恢復撫州尋希爾根奏聞賊東

距建昌滇賊西犯袁州勢難分應若臣舍建昌而援袁州恐撫州已復旋棄江右何日可定仍宜合力以勦建昌之賊

上諭撫州雖不可棄袁州亦屬要地希爾根兵可破建昌則進若難以徑進且鎮守撫州令將軍哈爾噶齊仍率兵援袁至于所復地方更令總督提督發新募兵速赴將軍軍前以資守禦

命江西巡撫白色純赴贛撫定人民

上諭兵部今將軍希爾根等擊敗賊衆恢復撫州不久
即定建昌廣信諸處亟須撫安百姓其令巡撫白色
純星赴贛州爾部速行移會

乙酉

詔復續順公沈瑞官爵

平南王尚可喜奏續順公沈瑞身陷賊中不甘
從逆屢遣人通言請兵拯救臣因遣官兵赴閩
接應今已迎回粵東

上諭續順公沈瑞不甘從逆挈家回粵情屬可憫令復
還原爵仍管伊標官兵駐劄廣東

命和碩安親王岳樂為定遠平寇大將軍帥師規定廣
西

時總督金光祖奏廣西提督馬雄左江總兵官
郭義降賊全省變動

上命和碩安親王岳樂為定遠平寇大將軍率每佐領
護軍一人侍衛坤巴圖魯所帶每佐領驍騎二人并

王所屬包衣佐領護軍驍騎速赴廣東令都統覺羅
霍特伯郎素副都統吉圖堪珠拉禪偕往以郎素為
署護軍統領兵至江西日或由袁州進取長沙平定
廣西或徑抵廣西勦滅叛逆聽大將軍王與都統等
商酌以行又每佐領出驍騎一人付侍衛坤巴圖魯
隨後率往汝寧尋又

命輔國將軍瓦山隨大將軍安親王進討

丁亥將軍額楚奏復徽州

命卽帥師進取饒州

先是

上策額楚不日必取徽州恐取徽州後額楚等按兵不
進

諭令克城之日徑赴江西速取饒州至是額楚奏言敗
賊績溪克復縣城本月十八日乘勝進至徽州
賊望風潰遁郡城遂復時巡撫靳輔報賊逼池
州

上命額楚等量留兵駐徽州速行進取饒州會合江西
兵

平定三逆方略卷九